

0  
1cm  
2  
3  
4  
5  
6  
7  
8  
9  
10  
11  
12  
13  
14  
15  
16  
17  
18  
19  
20  
21  
22  
23  
24  
25  
26  
27



浙江圖書館



浙江圖書館



浙江圖書館

文公先生集卷之四十一

浙江圖書館

浙江圖書館



浙江圖書館

文公先生朱子大全卷之四十一

書

答馮作肅

所諭兩條如叔京兄所論孔子非沮子貢乃勉其進此意甚善而作肅所疑亦有不得不疑者但此章自不必別為之說但有伊川先生解云我不欲人之加諸我也亦欲無加諸人仁也已所不欲勿施於人恕也恕則子貢可勉而能仁則非子貢之所及此意又分明矣傳施濟衆之問與此語先後不可考疑却因能近取譬之言用力有功而有欲無加人之說也熹嘗謂欲立人欲達人即子貢所謂欲無加人仁之事也能近取譬求仁之方即孔子所謂勿施



如

於人怨之事也。熟玩文意，似當加此。然諸先達未之嘗言，未知是否。幸試思之。更白叔京兄質其可否，復以見諭。幸甚。又所引與點為證，恐聖人與點之意不止如此。亦可并商量也。

答馮作肅

所諭懲創後生妄作之弊，甚善。然亦不可以此而緩於窮理。但勿好異求新，非人是已。則知識益明，而無穿穴之害矣。若因陋畜疑，不為勇決之計，又非所以矯氣質之偏而進乎日新也。

答馮作肅

云諭頗為他慮所牽，不得一意講習，只得且將明白義理。

云論頗為他慮所牽不得一意講習只得且將明白義理  
澆灌涵養令此義理之心常勝便是緊切功夫久之須得  
力也

答馮作肅

敬義之說甚善然居敬窮理二者不可偏廢有所偏廢則  
德孤而無所利矣動靜仁智之躰對下文樂壽為仁智之  
效而言猶言其體段如此耳非躰用之謂也學者求為仁  
智之事亦只如上章居敬窮理之說便是用力處若欲動  
中求靜靜中求動却太支離然亦無可求之理也

以伊尹為天民蓋以其事言之如耕莘應聘之事即分明  
見得有此蹤跡也治亦進亂亦進是指五就湯五就桀而  
言乃是就湯之後以湯之心為心非不待可行而遽行之

謂也傳說是大賢比伊尹須少貶其見可而後行雖同但所以行者或不及耳周孔又高直是正已而物正之事可行而行亦有所不足道矣

二南乃天子諸侯燕樂用之鄉人用之邦國所以風天下

也然隨事自有正樂者則兼及之如燕禮自有鹿鳴等詩無正樂者

則專用之如鄉飲酒別無詩也恐是如此然亦未及考也

可欲之善與繼善之善同有諸已之信與成之者性理雖

一而所施則異當更深察之

性情等說有已見叔京書者但所與嵩卿論者今議其得

夫於此嵩卿云理即性也不可言本此言得之程子亦云性即理也

今見遺書但其下分別感有內外則有病作肅非之是也

作肅又云性者自然理則必然而不可悖亂者此意亦近



作肅又云性者自然理則必然而不可悖亂者此意亦近  
之語亦但下云理不待性而後有必因性而後著此則有  
大病蓋如此則以性與理為二也下云性者理之會却好  
理者性之通則又未然蓋理便是性之所有之理性便是  
理之所會之地而蒿卿失之於太無分別作肅又失之於  
大分別所以各人只說得一邊也作肅云情本於性故與  
性為對心則於斯二者有所知覺而能為之統御者也未  
動而無以統之則空寂而已已動而無以統之則放肆而  
已此數句却好但必以不動為心則又非矣若心本不動  
則孟子又何必四十而後不動心乎須知未動為性已動  
為情心則貫乎動靜而無不在焉則知三者之說矣知言

曰性立天下之有情效天下之動心妙性情之德此言甚  
精密與其他說話不同試玩味之則知所言之失矣

答連嵩卿

正顏色斯近信矣此言持養久熟之功正其顏色即近於  
信蓋表裏如一非但色莊而已以上下兩句考之可見非  
謂正顏色即是近信也若非持養有素則正顏色而不近  
信者多矣

宿諾者未有以副其諾而預諾之如今人未有此物而先

以此物許人之類

集解不  
用此義

盡心以見處而言盡性以行處而言

易簣結纓未須論擾劣但看古人謹於禮法不以死生之

變物其所守如此便使人有行一不義殺一不辜而得天

變易其所守如此便使人有行一不義殺一不辜而得天下不為之心此是緊要處子路仕衛之失前輩論之多矣然子路却是見不到非知其非義而苟為也

以道左為無用則道乃無用之物也而可乎但仁是直指人心親切之妙道是統言義理公共之名故其言有親疏耳實則無二物也中庸曰修道以仁胡子亦謂人而不仁則道義息意亦可見

天地設位而易行乎其中以造化言之也乾坤成列而易立乎其中以卦位言之也

乾者萬物之始對坤而言天地之道也元者萬物之始對亨利貞而言四時之序也錯綜求之其義乃盡

功用妙用之說來諭得之

所謂天地之性。即我之性。豈有死而遽亡之理。此說亦未為非。但不知為此說者。以天地為主耶。以我為主耶。若以天地為主。則此性即自是天地間一箇公共道理。更無人物彼此之閒。死生古今之別。雖曰死而不亡。然非有我之得私矣。若以我為主。則只是於自己身上認得一箇精神魂魄。有知有覺之物。即便目為己性。把持作弄。到死不肯放舍。謂之死而不亡。是乃私意之尤者。尚何足與語死生之說性命之理哉。釋氏之學。本是如此。今其徒之黠者。往往自知其陋。而稍諱之。却去上頭別說一般玄妙道理。雖若混漾不可致詰。然其歸宿實不外此。若果如此。則是一

天地性也。列有若干人物之性。每性各有界限。不相交

簡天地性中別有若干人物之性每性各有界限不相交  
雜改名換姓自生自死更不由天地陰陽造化而為天地  
陰陽者亦無所施其造化矣是豈有此理乎煩以此問子  
晦渠必有說却以見諭

答連嵩卿

為其多聞也為其賢也多聞何以謂之師夫賢有大小  
記曰以人望人則賢者可知至於多識前言往行以畜  
其德易之大畜故可以為師

賢與多聞細分固當有別但若只如此理會則與王氏新  
經何異恐不必深致意也下段春秋補助之說放此  
配義與道而不言仁充塞天地之間則仁在其中矣孟

子言氣主 集義故也

更熟看上下文子細思索不可只如此草草說過

有諾已之謂信無反身而誠則能動人也如何信與誠  
大槩相似但反身而誠所指處地位稍高亦未論能動人  
否也

孟子不見儲子謂其儀不及物夫儲子之平陸特遣人  
致幣交於孟子則其接也不以禮孟子何以受其幣而  
不見豈非不胥教誨之道與孔子不見孺悲而鼓瑟之

義同

初不自來但以幣交未為非禮但孟子既受之後便當來  
見而又不來則其誠之不至可知矣故孟子過而不見施

限之宜也亦不胥之教誨也

報之宜也亦不屑之教誨也

楚令尹子南之子棄疾雍糾之妻一告而殺夫一不告而殺父二者亦不幸而遇此然當如何為正

居二者之間調護勸止使不至於相夷者上也勸之不從死而以身悟之次也舍是亦無策矣

相公不足以有為民不免左袒管仲之不死得為仁乎或以為管仲自信其才雖不遇而仲之仁自若也若夫成功則天也

孔子許管仲以仁正以其功言之耳非以管仲為仁人也若其無功又何得為仁乎

答連嵩卿

恭敬二字語孟之言多矣如敬而無失與人恭而有禮  
居處恭執事敬行己也恭事上也敬責難於君謂之恭  
陳善閉邪謂之敬伊川先生言發於外者謂之恭有諸  
中者謂之敬蓋恭敬只一理表裏之言以此意解語孟  
之言似不契莫是有輕重否

恭主容敬主事自學者而言則恭不如敬之力自成德而  
言則敬不如恭之安

鬼神馮依此亦有理莫見乎隱莫顯乎微而已此莫只  
是誠之不可揜感而以通之意否

鬼神馮依之說大槩固然然先生蓋難言之亦不可不識  
其意也



窮神則無易矣

此言人能窮神則易之道在我矣豈復別有易哉

乾是聖人道理坤是賢人道理

乾是自然而然坤便有用力處

論性不論氣不備論氣不論性不明

論性不論氣則無以見生質之異論氣不論性則無以見

理義之同

兵法遠交近攻須是審行此道智崇札甲之意蓋學者其知要

高明其行須切近立則見其參於前所見者何事竊謂

言忠信行篤敬所主者誠敬而已所主者既誠敬則所

見者亦此理而無妄矣故坐必如尸立必如齊此理未

嘗不在前也

二說皆善

顏淵問仁孔子告之以仁與禮仁與禮果異乎竊謂五常百行理無不貫仁者人此者也義者宜此禮者履此仁之與禮其命名雖不同各有所當皆天理也人之所以滅天理者以為人欲所勝耳人能克去己私則天理自復動容周旋中禮仁孰大焉

仁禮之說亦得之但仁其統躰而禮其節文耳

答連高卿

德輔如毛民鮮克舉之孔子所謂為仁由己也仁以為己任不亦重乎程子所謂克己最難也周子亦曰至易而行

在亦重乎程子所謂克己最難也周子亦曰至易而行之必果  
難果而確無難焉蓋輕故易重故難知其易故行之必果  
知其難則守之宜確能果能確則又何難之有乎恐不必  
引堯舜病諸以為任重之證也

死生有命言稟之素定非今日所能移富貴在天言制之  
在彼非人力所能致如所論却費力也

天下歸仁熟考經文及程氏說似只謂天下之人以仁歸  
之與呂氏贊不同蓋事事合理則人莫不稱其仁如宗族  
稱孝鄉黨稱悌之比若有毫髮之私留於胸中則見乎外  
者必有所不可掩矣人亦必以其實而稱之又何歸仁之  
有

知化只是知化育之道不必以知為主但窮神知化存神

過化伊川橫渠說此二義皆不同試考其說當孰從耶  
忠實文不見於經然亦有理蓋忠則只是誠實質便有損  
文就質之意矣

曾子言仁人此義宜此只就孝上說孟子言仁之實義之  
實則兼孝悌而言程子言此雖只是一理然須分別得出  
是亦理一而分殊之意大凡道理皆如此也

一人此一段

夫仁者已欲立而立人已欲達而達人所謂以己及物人  
也能近取譬可謂仁之方也已所謂推己及物恕也  
並行不悖一章甚善此君子所以不謂命也但堯舜孔子  
為疏戚之異似未然此各是發明一事皆不以天而廢人

者然所謂人者是亦天而已矣此所以並行而不相悖

○ 答程允夫

洵

讀蘇氏書愛其議論不為空言竊敬慕焉

蘇氏議論切近事情固有可喜處然亦譎矣至於術浮華而忘本實貴通達而賤名檢此其為害又不但空言而已然則其所謂可喜者考其要歸恐亦未免於空言也為學之道憂憂乎難哉

為學之道至簡至易但患不知其方而溺心於淺近無用之地則反見其難耳

穎濱浩然一段未知所去取

反復讀孟子此章則蘇氏之失自見

孟子集解先錄要切處一二事如論養氣論性之類

孟子集解雖已具藁然尚多所疑無人商榷此二義尤難明豈敢輕為之說而妄以示人乎來書謂此二義為要切處固然然學者當自博而約自易而難自近而遠自下而高乃得其序今舍七篇而直欲論此是躐等也為學之序不當如此而來書指顧須索氣象輕肆其病尤大

窮理之要不必深求先儒所謂行得即是者此最至論若論雖高而不可行失之迂且矯此所謂過猶不及其為失中一也

致知

窮理之要不必深求此語有大病殊駭聞聽行得即是固為至論然窮理不深則安知所行之可否哉宰子以短喪

為至論是以不可為可也子路以正名為迂是以不可為不可

爲安是以不可爲可也子路以正名爲迂是以可爲不可也彼親見聖人日聞善誘猶有是失況於餘人恐不但如此而已窮理旣明則理之所在動必由之無論高而不可行之理但世俗以苟且淺近之見謂之不可行耳如行不由徑固世俗之所謂迂不行私謁固世俗之所謂矯又豈知理之所在言之雖若甚高而未嘗不可行哉理之所在即是中道惟窮之不深則無所準則而有過不及之患未有窮理旣深而反有此患也易曰精義入神以致用也蓋惟如此然後可以應務未至於此則凡所作為皆出於私意之鑿實行而已雖使或中君子不貴也

前所論蘇頴濱正以其行事爲可法耳

蘇黃門謂之近世名卿則可前書以顏子方之僕不得不  
論也今此所論又以為行事可法本朝人物最盛行事可  
法者甚衆不但蘇公而已大抵學者貴於知道蘇公早拾  
蘇張之緒餘晚醉佛老之糟粕謂之知道可乎古史中論  
黃帝堯舜禹益子路管仲曾子子思孟子老聃之屬皆不  
中理未易槩舉但其辯足以文之世之學者窮理不深因  
為所眩耳僕數年前亦嘗惑焉近歲始覓其緣

所謂行事者內以處已外以應物內外俱盡乃可無悔  
古人所貴於時中者此也不然得於已而失於物是亦  
獨行而已矣

處已接物內外無二道也得於已而失於物者無之故凡

失於物者此謂未得於已者也然得謂得此理失謂失此理



失於物者皆未得於己者也然得謂得此理失謂失此理非世俗所謂得失也若世俗所謂得失者則非君子所當論矣時世之說亦未易言若如來諭則是安常習故同流合汙小人無忌憚之中庸後漢之胡廣是也豈所謂時中者哉大抵俗學多為此說以開苟且放肆之地而為蘇學者為尤甚蓋其源流如此其誤後學多矣

答程允夫

所示詩文筆力甚快書中所云則未敢聞命別紙條折以往試熟看數過當自見得大抵自道學不明千有餘年為士者習於耳目見聞之陋所識所趣不過如此如欲為文章之士而已則以吾弟之才少加勉勵自應不在人後但

不當妄談義理徒取誦於識者若果有意於古人之學則如所示皆未得其門而入者要須把作一件大事深思力究厚養力行然後可議耳但恐浮艷之詞染習已深未能勇決棄彼而取此則非僕之所敢知也

答程允夫

熹承寄示前書所論皆未中理不得不相惋來書謂熹之言乃論蘇氏之粗者不知如何而論乃得蘇氏之精者此在吾弟必更有說然熹則以為道一而已正則表裏皆正譎則表裏皆譎豈可以折精粗為二致此正不知道之過也又謂洗垢索瘢則孟子以下皆有可論此非獨不見蘇氏之失又并孟子而不知也夫蘇氏之失著矣知道愈明

青

見之愈切雖欲為之覆藏而不可得何待洗垢而索之耶  
若孟子則如責天白日無垢可洗無癥可索今欲掩蘇氏  
之疵而援以為比豈不適所以彰之耶黃門比之乃兄似  
稍簡靜然謂簡靜為有道則與子張之指清忠為仁何以  
異第深考孔子所答之意則知簡靜之與有道蓋有間矣  
況蘇公雖名簡靜而實陰險元祐末年規取相位力引小  
人楊畏使傾范忠宣公而以已代之既不效矣則誦其彈  
文於坐以動范公此豈有道君子所為哉此非熹之言前  
輩固已筆之於書矣吾弟乃謂其躬行不後二程何其考  
之不詳而言之之易也二程之學始焉未得其要是以出  
入於佛者及其反求而得諸六經也則豈固以佛老為是

哉。如蘇氏之學則方其年少氣豪固嘗妄觝禪學如大悲  
閣中和院等記可見矣。及其中歲流落不耦鬱鬱失志然  
後匍匐而歸焉。始終迷惑進退無據以比程氏正傷子先  
病後瘳先瘳後病之說。吾弟比而同之是人欲洗垢而索  
孟子之癥也。又謂程氏於佛老之言皆陽抑而陰用之夫  
竊人之財猶謂之盜況程氏之學以誠為宗今乃陰竊異  
端之說而公排之以蓋其跡不亦盜憎主人之意乎。必若  
是言則所謂誠者安在而吾弟之所以歲抑之意果何謂  
也。挾天子以令諸侯乃權臣跋扈借資以取重於天下豈  
真尊主者哉。若儒者論道而以是為心則亦非真尊六經  
者此其心跡之間反覆辟援去道已不啻百千萬里之遠。

方且自為邪說詖行之不暇又何暇攻百氏而望其服於  
已也凡此皆蘇氏心術之蔽故其吐辭立論出於此者十  
而八九吾弟讀之愛其文辭之工而不察其義理之悖日  
往月來遂與之化如入鮑魚之肆久則不聞其臭矣而此  
道之傳無聲色臭味之可娛非若侈麗闕術之辭縱橫揮  
闔之辨有以眩世俗之耳目而蠱其心自非真能洗心滌  
慮以入其中真積力久卓然自見道躰之不二不容復有  
毫髮邪妄雜於其閒則豈肯遽然舍其平生之所尊敬向  
慕者而信此一夫之口哉故伊川之為明道墓表曰學者  
於道知所向然後見斯人之為功知所至然後見斯名之  
稱情蓋為此也然世衰道微邪偽交熾士溺於見聞之陋

各自是其所是若非痛加剖析使邪正真偽判然有歸則  
學者將何所適從以知所向況欲望其至之乎此熹之所  
不得不為吾弟極言而忘其僭越之罪也程氏書布在天  
下所至有之此間所有不過是耳謾寄大全集一本龜山  
語錄一本去大全中有他人之文目錄中已題出矣恐已  
自有之如未有且留着夏中寄來未晚也程氏高弟尹公  
嘗謂易傳乃夫子自著欲知其道者求之於此足矣不必  
傍觀他書蓋語錄或有他人所記未必盡得先生意也又  
言先生踐履盡一部易其作傳只是因而寫成此言尤有  
味試更思之若信得及試用年歲之功屏去雜學致精於  
此自當有得始知前日所謂蘇程之室者無以異於雜薰

難 妨

猶冰炭於一器之中欲其芳潔而不汙蓋亦難矣蘇氏文辭雄麗近世無匹若欲作文自不放模範但其詞意於處譎詭亦有非知道君子所欲聞是以平時每讀之雖未嘗不喜然既喜未嘗不厭往往不能終帙而罷非故欲絕之也理勢自然蓋不可悖然則彼醉於其說者欲入吾道之門豈不猶吾之讀彼書也哉亦無恠其一胡一越而終不合矣蘇程固嘗同朝程子之去蘇公嗾孔文仲斲而去之也使其道果同如吾弟之所論則雖異世亦且神交豈至若是之戾耶文仲為蘇所嗾初不自知晚乃大覺憤悶嘔血以至於死見於呂正獻公之遺書尚可考也吾弟未之見耳因筆及此似傷直矣然不直則道不見吾弟察之幸

甚

答程允夫

仁者天理也理之所發莫不有自然之節中其節則有自然之和此禮樂之所自出也人而不仁滅天理夫何有於禮樂

此說甚善但仁天理也此句更索消詳不可只如此說過鬼神者造化之妙用禮樂者人心之妙用

此說亦善

禮之用和為貴禮之用以和為貴也和如和羹可否相濟先王制禮所以節人情抑其太過而濟其不及也若知和而和則有所偏勝如以水濟水誰能食之中庸曰



發而皆中節謂之和知和而和則不中節矣

以和對同則和字中已有禮字意思以和對禮則二者又不可不分恐不必引和羹相濟之說

政者法度也法度非刑不立故欲以政道民者必以刑齊民德者義理也義理非禮不行故欲以德道民者必以禮齊民二者之決而王伯分矣人君於此不可不審此一正君而因定之機也

此說亦善然先生非無政刑也但不專恃以為治耳

孔氏之門雖所尊者有淺深然皆以誠實不欺為主子曰由誨汝知之乎知之為知之不知為不知是知也教之以誠也若未得謂得未證謂證是謂自欺如此人者

其本已差安可與入道樊遲問智孔子既告之矣又質  
之子夏反覆不知已不敢以不知為知也凡此皆為學  
用力處

此說亦善

非其鬼而祭之諛也諛於鬼則於人可知矣

推說則如此亦可但本文諛字止謂諛於鬼神耳

自孔子謂季氏八佾舞於庭至季氏旅於泰山五段皆  
聖人欲救天理於將滅故其言哀痛一切與春秋同意  
此說亦然

夏殷之禮杞宋固不足徵然使聖人得時得  
所制  
作雖無所徵而可以義起者亦必將有以處之為是言

者恐後生以私意妄議先王典禮耳

夏殷之禮夫子固嘗講之但祀宋衰微無所考以證吾言耳若得時有作當以義起者固必有以處之但此言之發非謂後生妄議而云耳

身有死生而性無死生故鬼神之情入之情也

死生鬼神之理非窮理之至未易及如此所論恐墮於釋氏之說性固無死生然性字須子細理會不可將精神知覺做性字看也

居上不寬為禮不敬臨喪不哀吾何以觀之哉寬敬哀皆其本也聖人觀人必觀其本實不足而文有餘者皆不足以入道

此說得之

心有所知覺則明明則公故曰惟仁者能好人能惡人仁者固有知覺然以知覺為仁則不可更請合仁義禮智四字思惟就中識得仁字乃佳

一念之善則惡消矣一念之惡則善消矣故曰苟志於仁矣無惡也又曰未有小人而仁者也

此意亦是然語太輕率似是習氣之病更當警察療治也行不由道而得富貴是僥倖也其可苟處乎行不由道而得貧賤是當然也其可苟去乎然則君子處貧賤而富貴之際視我之所行如何耳行無愧於道去貧賤而處富貴可也故曰富貴是人之所欲也不以其道得之

富貴可也故曰富貴是人之所欲也不以其道得之

不處也貧與賤是人之所惡也不以其道得之不去也  
當以不以其道為一句得之為一句先生批如此說則其字無下落恐不

成文  
理也

此章只合依先儒說有得富貴之道有得貧賤之道為是  
張子韶云此言君子審富貴而安貧賤亦甚簡當

朝聞道夕死可矣天下之事惟死生之際不可以容偽  
非實有所悟者臨死生未嘗不亂聞道之士原始反終  
知生之所自来故知死之所自去生死去就之理了然  
於心無毫髮疑礙故其臨死生也如晝夜如夢覺以為  
理之常然惟恐不得正而斃耳何亂之有學至於此然  
後可以託六尺之孤寄百里之命臨大節而不可奪也

此又雜於釋氏之說更當以二程先生說此處熟味而深  
求之知吾儒之所謂道者與釋氏迥然不同則知朝聞夕  
死之說矣

君子懷德小人懷土君子懷刑小人懷惠君子安於德  
義如小人安於居處君子安於法度如小人之安於惠  
利心之所安一也所以用其心不同耳

此蘇氏說之精者亦可取也

放於利而行多怨利與害為對利於己必害於人利於  
人必害於己害於己則我怨害於人則人怨是利者怨  
之府也君子循理而行理之所在非無利害也而其為  
利害也公故人不得而怨人且不得而怨而況於己乎

此說得之

德不孤中德也中必有鄰夫子之道至今天下宗之非  
有鄰乎

此說非是

心本仁違之則不仁顏子三月不違仁不違此心也  
熟味聖人語意似不如此然則何以不言回也其身三月  
不違心乎

凡人有得於此必有樂於此方其樂於此也寢可忘也  
食可廢也蓋莫能語人以其所以然者唯以心體之乃  
可自見周濂溪嘗使二程先生求顏子所樂者何事而  
先生亦謂顏子不改其樂其字有味又云使顏子樂道

則不為顏子夫顏子會道亦何所樂然先生不欲學者  
作如是見者正恐人心有所繫則雖以道為樂亦猶物  
也須要與道為一乃可言樂不然我自我道自道與外  
物何異此須自躰會乃得之

此只是贅味得一箇樂字未嘗正當說著聖賢樂處更宜  
於著實處求之

易曰敬以直內義以方外敬以養其心無一毫私念可  
以言直矣由此心而發所施各得其當是之謂義此與  
中庸言喜怒哀樂未發謂之中發而皆中節謂之和相  
表裏中庸言理易言學

此說也是也



此說也是也

聖言其所行智言其所知聖智兩盡孔子是也若伯夷  
伊尹柳下惠者其力皆足以行聖人之事而其知不逮  
孔子故惟能於清和任處知之盡行之至而其他容有  
所未周然亦謂之聖者以其於此三者已臻其極雖使  
孔子處之亦不過如此故也前輩言人固有力行而不  
知道者若三子非不知道知之有所未周耳知之未周  
故伯夷於清則中而於任於和未必中也伊尹柳下惠  
於任於和則中而於清未必中也易大傳論智常與神  
相配而中庸稱舜亦以大智目之則智之為言非天下  
之至神孰能與於此

此說亦是但易大傳以下不必如此說智有淺深若孔子

之金聲則智之極而無所不周者也學者則隨其知之所及而為大小耳豈可槩以為天下之至神乎

學道者始於知之終於行之猶作樂者始以金奏終以玉節也孟子之意特取其終始言之不必於金玉上求其義

此說亦是但孟子正取金玉以明始終智聖之義蓋金聲有洪纖而玉聲則首尾純一故也

不動心一也所養有厚薄所見有正否則所至有淺深觀曾子子夏子路孟子告子北宮黜孟施舍之議論趨操則可見矣

此章之說更須子細玩索不可如此草草說過郭立之以

不勸心處已以擴充之學教人與王介父以高明中庸之學析為二致何以異

郭立之議論不可曉多類此尹和靖言其自黨論起不復登程氏之門伊川沒亦不弔祭則其所得可知矣此論未理會析為二致正恐其所謂不動心者未必孟子之不動心也

○ 答程允夫

或子

圖

去冬走湖湘講論之益不少然此事須是自做工夫於日用間行住坐卧處方自有見處然後從此操存以至於極方為已物爾敬夫所見超詣卓然非所可及近文甚多未暇錄且今寫此一銘去此尤勝他文也密院闕期尚遠野性難馴恐不堪復作吏然亦姑任之不能預以為憂耳所

示語孟諸說深見日來進學之力別紙一一答去更且加  
意如此探討不已當有得耳丁寧葉仁來時去取書恐更  
有商量處一一示及孤陋無所用心惟得朋友講論則欣  
然終日千萬有以慰此懷也可欲之謂善此句尋常如何  
看因來論及龜山易傳傳出時已缺乾坤只有章彙數段  
不甚完備繫辭三四段不絕筆亦不成書此有寫本謾附  
去然細看亦不甚滿人意不若程傳之厭飫充足潘子淳  
書頃亦見之蓋雜佛老而言之者亦不必觀向所論蘇學  
之蔽吾弟相信未及今竟以為如何他時於已學上有見  
處此等自然冰消瓦解無立脚處遊於聖人之門者難為  
言真不虛語正蒙已領近泉州刊行程氏遺書乃二先生

書錄七間所錄文與本首當奉寄也此學寂寥士友不

語錄此間所錄且夕得本首當奉寄也此學寂寥士友不肯信向吾弟幸有其志又有其才每一得書為之增氣更願專一工夫期以數年當有用力處如良齋銘便是做工夫底節次近日相與考證古聖所傳明庭建立此箇宗旨相與守之吾弟試以味之有疑却望示諭秋試得失當已決早了此一事亦佳然是有命焉亦不足深留意也

○ 答程允夫

可欲之說甚善但云可者欲之不可者不欲非善矣乎此語却未安蓋只可欲者便是純粹至善自然發見之端學者正要於此識得而擴充之耳若云可者欲之則已是擴充之事非善所以得名之意也又謂能持敬則欲自寡此

語其當但紙尾之意以為須先有所見方有下手用心處則又未然夫持敬用功處伊川言之詳矣只云但莊整齊肅則心便一一則自無非僻之干又云但動容貌整思慮則自然生敬只此便是下手用功處不待先有所見而後能也須是如此方能窮理而有所見惟其有所見則可欲之幾瞭然在目自然樂於從事欲罷不能而其敬日躋矣伊川又言涵養須用敬進學則在致知又言入道莫如敬未有致知而不在敬者考之聖賢之言如此類者亦衆是知聖門之學別無要妙徹頭徹尾只是箇敬字而已又承苦於妄念而有意於釋氏之學此正是言不曾實下持敬工夫之故若能持敬以窮理則天理自明人欲自消而彼

工夫之故若能持敬以窮理則天理自明人欲自消而彼

之邪妄將不攻而自滅矣至於爲飛魚躍之問則非他人  
言語之所能與亦請只於此用力自當見得蓋子思言君  
子之道費而隱以至於天下莫能載莫能破因舉此兩句  
以形容天理流行之妙明道上蔡言之已詳想非有所不  
解正是信不及耳欲信得及捨持敬窮理則何以哉所示  
宗派不知何人爲之昔子貢方人而孔子自謂不暇蓋以  
學問之道爲有急乎此者故也使此人而知此理則宜亦  
有所不暇矣無見於此則又何所依據而輕議此道之傳  
乎若云只據文字所傳則其中差互叢推亦不可勝道今  
亦未暇暇之論且以耳目所及與前輩所嘗論者言之圖內  
游定夫所傳四人喜識其三皆未嘗見游公而三公皆師

潘子醇亦不云其出游公之門也此殆見游公與四人者  
皆建人而妄意其為師弟子耳至於張子詔喻子才之徒  
雖云親見龜山然其言論風旨規莫氣象自與龜山大不  
相似胡文定公蓋嘗深闢之而熹載其說於程氏遺書之  
後試深考之則世之以此學自名者其真偽皆可覈矣胡  
公答仲并語切中近時學者膏肓之病尤可發深省也三  
年無改只是說孝子之心如此非指事而言也存得此心  
則雖或不得已而改焉亦無害其為孝矣元祐之於熙豐  
固有所謂不得已者然未知當時諸公之心如何若蘇公  
野花啼鳥之句得無亦有幸禍之心耶

答程允夫



亦足以發

顏子所聞入耳著心布乎四躰形乎動靜則足以發明夫子之言矣

忠恕誠仁之別

誠字以心之全躰而言忠字以其應事接物而言此義理之本名

也若曾子之言忠恕則是聖人之事故其忠與誠恕與仁

得通言之恕本以推己及物得名在聖人財為己己及物矣侯氏說未嘗誤萬物

者誠有病

有德者必有言有仁者必有勇洵竊謂有德者未必有

言然因事而言則言之中理可必也仁者未必有勇然

義所當為則為之必力可必也故皆曰必有

有德者未必以能言稱仁者未必以勇著然云云以下各如所說

天下有道則庶人不議不議謂不得與聞國政非謂禁之使勿言也如陽虎之流以庶人而與國政者也

恐不如此陽虎饋豚於孔子蓋以大夫自處非庶人也蘇說之誤

圖

天何言哉四時行焉百物生焉天何言哉洵竊謂四時行百物生皆天命之流行其理甚著不待言而後明聖人之道亦猶是也行止語默無非道者不為言之有無而損益也有言乃不得已為學者發耳明道先生言若於此上看得破便信是會禪亦非謂此語中有禪蓋言

於此上看得破便信是會禪亦非謂此語中有禪字也

聖人之道坦然明白於此見得分明則道在是以不必

參禪以求之也

如此辨別甚善近世甚有病此言者無以此意曉之然不能如是之快也

子夏曰仕而優則學學而優則仕洵竊謂仕優而不學則無以進德學優而不仕則無以及物仕優而不學固無足議者學優而不仕亦非聖人之中道也故二者皆非也仕優而不學如原伯魯之不說學是也學優而不仕如荷蓀文人之流是也子夏之曰似為時而發其言雖反覆相因而各有所指或以為仕而有餘則又學學而有餘則又仕如此則其序當云學而優則仕仕而優

言

則學今反之則知非相因之辭也不知此說是否

此說亦佳舊亦嘗疑兩句次序顛倒今云各有所指甚佳  
遺書載司馬溫公嘗問伊川先生欲除一人為給事中  
云云洵竊謂若以公言之何嫌之足避豈先生於此亦  
未能自信邪

前賢語默之節更宜詳味吾輩只為不理會此等處故多  
悔吝耳近正有一二事可悔忽讀此問為之矍然

上蔡語錄中有真我之語洵竊謂不必如此立論恐啓  
後人好寄之弊蓋母我之我與我所固有之我字同義  
異本自分明只下一真字便似生事二程先生議論不  
如此上蔡之學所造固深此亦似是其小疵也

如此上蔡之學所造固深此亦似是其小疵也  
此說甚當上蔡所云以我視以我聽者語亦有病

答程允夫

龜山曰宰我問三年之喪非不知其為薄也只為有疑  
故不敢隱於孔子只此無隱便是聖人作處

龜山之意當是如此然聖人之無隱與宰我之無隱亦當  
識其異處



伊川舟行遇風端坐不為之變自以為誠敬之力烈風  
雷雨而舜不迷錯其亦誠敬之力歟

之不迷此恐不足以言之漸

善為說辭則於德行或有所未至善言德行則所言皆  
其自己分上事也

此說得之

善與人同以己之善推而與人同為之也舍己從人樂取諸人以為善以人之善為己之善也

此說亦善

賢賢事父母事君與朋友交此四者皆能若子夏之言可以言學矣然猶有雖曰未學之語若猶賴乎學者蓋雖能如是而不知其所以能如是者從何而來則所謂行之而不著習矣而不察者也

此句意思未見下落請詳言之方可議其得失也

蓋惡之心義之端故人不可使之無廉耻無廉耻則無以起其好義之心若之何而可化聖人之於民必使之

有耻且格者此也

人自是不可無耻不必引羞惡好義為言也

知敬親者其色必恭知愛親者其色必和此皆誠實之發見不可以偽為故子夏問孝孔子答之以色難

據下文恐是言承順父母之色為難然此說亦好

君子周而不比小人比而不周君子循理之所在周流天地之間無不可者其親之也理之所當親也其遠之也理之所當遠也何比之有

尊賢容衆嘉善而矜不能此之謂周溺愛徇私黨同伐異此之謂比周周徧也比偏比也不必言周流天地之間

謝上蔡曰慎言其餘慎行其餘皆有深意惟近思者可

以得之蓋言行有絲毫不慎則於理有絲毫之失則與  
天地不相似矣

慎言其餘慎行其餘籍用白茅之意似此推言於理不害  
然恐未遠說到此也

小人之陵上其初蓋微僭其禮之末節而已及充其僭  
禮之心遂至於弑父弑君此皆生於忍也故孔子謂季  
氏八佾舞於庭是可忍也孰不可忍也

敢僭其禮便是有無君父之心

人有中雖不然而能勉彊於其外者君子當求之於其  
中中者誠也外者偽也故父在當觀其事父之志行者  
行其志而有成者也父沒則人子所以事父之大節始



終可觀矣故父沒嘗觀其事父之行事父之行既已終始無愧而於三年之間又能不失其平日所以事父之道非孝矣乎

此說甚好然文義似未安

敏於事如必有事焉之事當為即為不失其幾也

事只是所行之事必有事焉不知尋常如何說請詳論之乃見所指之意大抵說經以彼明此固為簡便然或失其本意則彼此皆不分明所以貴於詳說也

子貢曰貧而無諂至告諸往而知來者此為學之法也亦可以見聖賢悟入深淺處凡窮理自有極致觀聖人如此發明子貢則可見矣

此章論進學之實效非論悟入深淺也悟入兩字既是釋  
氏語便覺氣象入此不得大學所謂知至格物者非悟入  
之謂

死生一理也死而為鬼猶生而為人也但有去來幽顯  
之異耳如一晝一夜晦明雖異而天理未嘗變也

死者去而不來其不變者只是理非有一物當在而不變  
也更思之

子聞之曰是禮也二字可以見聖人氣象宏大後世諸  
子所不及也

詩三百一言以蔽之曰思無邪與閑睢樂而不淫哀而  
不傷皆聖人教人誦詩之法

不傷皆聖人教人詩之法

此類言之太略不曉所主之意恐其間有差或致千里之謬也

見實理是為智得實是為仁

惟仁者能得是理而以得實為仁則仁之名義隱矣

理之至實而不可易者莫如仁義禮智信非仁不成如孝弟禮樂恭寬信敏惠皆仁之用也

凡數句亦未見下落

學者須先有所立故孔子三十而立又曰患所以立然則若何而能立曰窮理以明道則知所立矣

立是操存踐履之效所說非是患所以亡承不患無位而言蓋曰患無以立乎其位云爾

立

主

古者言之不出耻躬之不逮也如諸葛孔明草廬中對先生論曹孫利害其後輔蜀抗魏吳其言無一不酬者蓋古人無侈心故無侈言如此

所引事不相類

劉器之問誠之目於溫公曰當自不妄語入此易所謂修辭立其誠也

圖

近之

子謂公冶長可妻也長之可妻以其平昔之行也非以無罪陷於繆紲為可妻也

雖嘗陷於繆紲而非其罪則其平昔之行可知也斯之未能信言我於此事猶未到不疑之地豈敢蒞官臨政發

之於用乎

此事謂何事

子謂子貢曰女與回也孰愈孔子以此問子貢則子貢之才亦顏曾之亞然其所以不及二子者正在於以見聞為學孔子未欲以見聞外事語之故姑云吾與女弗如他日乃警之曰汝以予為多學而識之者歟道非多學所能識則聞一知十亦非所以為顏子

子貢言聞一知二知十乃語知非語聞也見聞之外復謂何事請更言之

忠與清皆仁之用有覺於中忠清皆仁無覺於中仁皆忠清

以覺為仁近年語學之大病如此四句尤為乖戾蓋若如此則仁又與覺為二而又在其下矣

又敬不違非從父之令謂事親以禮無違於禮也所謂起敬起孝

見志不從又敬不違則不得已而從父之令者有矣勞而不怨則所謂悅則復諫不敢疾怨也若不從而遂違之則父子或至於相夷矣

居簡而行簡則有志大略小之患以之臨事必有怠忽不舉之處居敬而行簡則心一於敬不以事之大小而此敬有所損益也以之臨事必簡而盡

居敬則明燭事幾而無私意之擾故其行必簡為仁固難

歟曰孔子不以易啓人之忽心亦不以難啓人之怠心  
故曰仁遠乎哉我欲仁斯仁至矣又曰為之難言之得  
無訥乎

仁固不遠然不欲則不至仁固難為之則無難致知以明  
之持敬以養之此學之要也不致知則難於持敬不持  
敬亦無以致知

為各一方

二者交相為用固如此然亦當各致其力不可恃此而責  
彼也

丘之禱久矣聖人與天地合其德與鬼神合其吉凶我  
即天地鬼神天地鬼神即我何禱之有

自他人言之謂聖人如此可也聖人之心豈以此而自居

耶細味丘之禱也久矣一句語意深厚聖人氣象與天人  
之分自求多福之意皆可見

以能問於不能以多問於寡有若無實若虛犯而不校  
此聖人之事也非與天同量者不能顏子所以未達一  
問者正在此故第曰嘗從事於斯非謂已能爾也

此正是顏子事若聖人則無如此之迹有如此說處便有  
合內外之意如舜善與人同舍己從人好察邇言用中於  
民必兼言之惟顏子行而不成故其事止於如此耳  
子絕四蓋以此教人也故曰母母者戒之之辭

母史記作無當以無為正

未見其止也學必止於中而止非息也於中止行耳百



尺竿頭猶須進步豈有止法乎

據上下章止字皆但為止息之意學止於中乃上其所之  
止非止息之意字同用異名審其所施竿頭進步狂妄之  
言非長於譬喻者

四科乃述論語者記孔氏門人之盛如此非孔子之言  
故皆字而不名與上文不當相屬或曰論語之書出於  
曾子有子之門人然則二子不在品題之列者豈非門  
人尊師之意歟

四科皆從於陳蔡者故記者因夫子不及門之歎而列之  
君子之道本末一致洒掃應對之中性與天道存焉行  
之而著書之而察則至矣孰謂此本也宜先而可傳此

當

末也宜後而可倦哉譬諸草木其始植也為之區別而  
已灌溉之長養之自牙蘗以至華實莫不有叙豈可誣  
也然學者多慕遠而忽近告之以性與天道則以為當  
先而傳教之以洒掃應對則以為當後而倦焉躡等陵  
節相欺以為高學之不成常必由此惟聖人下學上達  
有始有卒故自志學充而至於從心不踰矩自可欲之  
善充而至於不可知之神莫不有序而其成也不可禦  
焉觀孟子謂徐行後長者為堯舜之孝弟則洒掃應對  
進退之際苟行著而習熟焉焉有不可至於聖者  
子夏言我非以洒掃應對為先而傳之非以性命天道為  
後而倦教但道理自有大小之殊不可誣人以其所未至

唯聖人然後有始有卒一以貫之無次序之可言耳二先生之說亦是如此但學若不察一例大言無本末精粗之辨反使此段意指都無歸不須知理則一致而其教不可闕其序不可紊耳蓋惟其理之一致是以其教不可闕其序不可紊也更細思之

篤實也學論其實論其實則與君子者乎與色莊者乎君子有實者也色莊無實者也相應試如此用工夫如何

答劉平甫

近收耕老書說一貫之旨甚善但忠恕即說成兩貫了兩貫之理全然透不過忠恕裏面來如此即惡在其為一貫

首三段已  
見四十卷

耶此事政須自得而渠堅守師說自作障礙無如之何但  
循循不差却無躡等之患亦可貴爾

與平父書中雜說

近得廟堂記一本音甚蓋百十年前物刻畫完好尚有界  
行恨未令平甫見也

論語讀之想有味訓蒙草草不堪看只看要義自佳也  
沁縣羅家傳得先聖像甚佳并武侯成都本與閩本大異  
此像嚴毅沈正恐差近之心

二先生邵張公四象今并欲煩為背之惟橫渠一象服章  
不類或有此闊綃并告為摹易之如二先生野服如何  
元履此劄曾寄呈樞兄否此題目難做非顛俊尊上帝之

元履此答曾子呈極兄否此題目難做非餘俊博士帝之  
比而彼易為之亦不思矣又時宰何嘗知有此事遂爾發  
之殊不中節比以書正之得之

克己之道篤敬致知而已非禮勿視勿聽勿言勿動篤  
敬也所以知其為非禮者致知也

克己乃篤行之事固資知識之功然以此言之却似一切  
只合且就操存持養處說方見用切要處

言顧行行顧言故古者言之不出耻躬之不逮也中庸  
曰力行近乎仁論語司馬牛問仁子曰為之難言之得  
無訥乎

答司馬牛之意更宜思之

質直而好義則能脩身察言而觀色則能知人能脩

身外能知人而又待之以謙此盛德之士也雖欲不達  
得乎此與祿在其中同意實相禱之謂達有名無實  
之謂聞察言觀色如孟子所謂聽其言也觀其眸子人  
焉瘦哉

孔子所言三句皆誠實退讓之事能如此則不期達而自  
達矣非謂能脩身知人而待之以謙也說知人遠正意  
子路問政子曰先之勞之請益曰無倦凡不教而殺不  
戒視成慢令致期皆無以先之也既有以先之又當有  
以勞之帝堯曰勞之來之凡生之而不傷後之而不困  
皆勞之之謂也此堯舜之政也其要在力行耳故復告  
之以無倦

之以無倦

先之謂以身率之勞之謂以恩撫之二者苟無誠心又必  
倦矣故請益則曰無倦而已

簿書期會各有司存然不吾得以留意教化之事故曰

先有司

先有司然後綱紀立而責有所歸

答程允夫



張子曰天性在人猶未性之在冰凝釋雖異其為物一  
也觀張子之意似謂水凝而為冰一凝一釋而水之性  
未嘗動氣聚而為人一聚一散而人之性未嘗動此所  
以以冰喻人以水性喻天性也然極其說恐未免流於  
釋氏兄長以為如何

水

伸

程子以為橫渠之言誠有過者正謂此等發耳觀孔子子思孟子論性似皆不如此康節云性者道之形躰也心者性之郭郭也身者心之區宇也物者身之舟車也

鬼神之理某向嘗蒙指示大意云氣之來者為神往者為鬼天地曰神曰祇氣之來者也又曰鬼氣之往者也此說與張子所謂物之始生氣日至而滋息物生既盈氣日反而流散至之謂神以其神也反之謂鬼以其歸也之意同近見兄長所著中庸說亦引此然張子所謂物者通言萬物耶抑特指鬼神也若特指鬼神則所謂物者如易太傳言精氣為物之物爾若通言萬物則上四句乃泛言凡物聚散始終之理如此而下四句始三



言鬼神也精氣為物嚮亦嘗與季通講此渠云精氣為物者氣聚而為人也魂為變者氣散而為鬼神也此說如何更望詳賜批教

易大傳所謂物張子所論物皆指萬物而言但其所以為此物者皆陰陽之聚散耳故鬼神之德體物而不可遺也所謂氣散而為鬼神者非是

答程允夫

程子曰鬼神者天地之妙用造化之迹也氣之往來

地之用而鬼神尤其神者也然既已動於氣見於用矣是形而下者也故曰造化之迹呂氏曰萬

物之莫不有是氣氣也者神之盛也莫不有是鬼鬼也者鬼之盛也故人亦鬼神之會爾中庸說曰鬼神之為

德雖不可以耳目見聞接然萬物之聚散始終無非二

氣之屈伸往來者是鬼神之神德為物之躰而無物能遺

棄之者也向按此二說則張子所謂物之始生氣日至而滋息物生既盈氣日返而游散乃泛言萬

物聚散始終之理如此而鬼神者亦物之一爾但其德在物之中為尤盛故為物之躰而莫有能遺之者人亦

物之一也其斂散終始亦二氣之至伸往來與鬼神同故呂氏曰人亦鬼神之會耳然則非特人也凡天地之

間禽獸草木之聚散始終其理皆如此也其理一而其得於氣者有顯顯偏正厚薄之不同茲其所以有鬼神

人物之謝氏曰鬼神是天地妙用流行充塞觸目皆是

欲其有則有欲其無則無以氣感氣故能相為有無呂

氏曰鬼神周流天地之間無所不在雖寂然不動然因感而以血即此意也

詳此兩段皆是人物鬼神各為一物是殆見廟中泥塑鬼

神耳呂氏所謂人亦鬼神之會者甚精更請細推之

神耳 呂氏所謂人亦鬼神之會者其精更請細推之

### 答程允夫

太極解義以太極之動為誠之通麗乎陽而繼之者善屬焉靜為誠之復麗乎陰而成之者性屬焉其說本乎通書而或者猶疑周子之言本無分隸之意陽善陰惡又以類分又曰中也仁也感也所謂陽也極之用所以行也正也義也寂也所謂陰也極之躰所以立也或者疑如此分配恐學者因之或漸至於支離穿鑿不審如何此二義但虛心味之久當自見若以先入為主則辯說紛拏無時可通矣

仁義中正洵竊謂仁義指實德而言中正指躰段而言然常疑性之德有四端而聖賢多獨舉仁義不反禮智

何也

中正即是禮智

解義曰程氏之言性與天道多出此圖然卒未嘗明以此圖示人者疑當時未有能受之者也是則然矣然今乃遽為之說以傳之是豈先生之意耶

當時此書未行故可隱今日流布已廣若不說破却令學者枉生疑惑故不得已而為之說爾濂溪作太極圖發明道化之原橫渠作西銘焉示進為之方然二先生之學不知所造為孰深

此未易窺測然亦非學者所當輕議也

程子曰無妄之謂誠不欺其次矣無妄是聖人之誠不

欺是學者之誠如何

程子此段似是名理之言不為人之等差而發也

近思錄載橫渠論氣一其說與太極圖動靜陰陽之說相出入然橫渠立論不一而足似不若周子之言有本末次第也

橫渠論氣與西銘太極各是發明一事不可以此而廢彼其優劣亦不當輕議也

程子曰孔子言語句句是自然孟子言語句句是事實所謂事實者豈非是當行可行底事耶然未可謂自然者豈以其猶是思焉而得之歟

大槩如此更翫味之

所教學者看精我說甚善然竊以為學者須先從師友  
講貫粗識梗槩然後如此用工不然恐眩於衆說之異  
同也

此乃憚煩欲速之論非所敢聞然亦非獨此書為然若果  
有志無書不可讀但能剖析精微翫味久熟則衆說之異  
同自不能眩而反為吾磨礪之資矣

○ 答程允夫

昨來疑義久不奉報然後三長進又見得前說之是非也  
每與吾弟講論覺得吾弟明敏看文字不費力見得道理  
容易分明但似少却玩味踐履工夫故此道理雖看得相  
似分明却與自家身心無干涉所以滋味不長久總過了

似分明却與自家身心無干涉所以滋味不長久總過了

便休反不如遲鈍之人多費工夫方看得出者意思却又  
遠此是本原上一大病亦一詞一義之失也記得向在高  
沙因吾弟說覺得如此講語都無箇歸宿處曾奉荅云講  
了便將來踐履即有歸宿此語似有味更告思之草此為  
報不能多及餘惟力學自愛

○ 答程允夫



版籍固所職然執有所壓而不得為則亦無可奈何潘憲  
却要理會事俟出入少定試更白之或能相聽亦百里之  
幸也版籍分明自是縣道理財之急務今人只見重疊催  
稅之利而不察鄉吏隱瞞之害故不肯整理此是上下俱  
落在厮兒計中甚可漢也石鼓之役意思甚好但恐擇之

嘆

執

却難處耳。魏公好佛敬夫無如之何。此正明道先生所謂  
今之入人因其高明所以為害尤甚。不知這些邪見是壞  
却世間多少好人。破却世間多少好事也。誠字得力甚善  
然知之亦已晚矣。凡百就實事上更著力為佳。

答黃子厚

知讀精義有得。尤以為喜。大指固不出二先生之說。然並  
觀博考。見其淺深踈密。於毫釐之間。尤能發人意思。使人  
益信二先生之說不可易也。忠信只是一事。但自我而觀  
謂之忠。自彼而觀謂之信。此先生所以有盡已為忠。盡物  
為信之論也。鄙意如此。試思之。然否。却見諭登山之興。前  
日失之於跬步之間。今復冒暑而往。則有所不能矣。或恐



日失之於跬步之間今復冒暑而往則有所不能矣或恐  
欲尋舊約即請見過却議行計也伯恭甚愛上嵐山水前  
日經行適值風雨尤快心目也

文公先生朱子大全卷之四十一



浙江圖書館



浙江圖書館



浙江圖書館



浙江圖書館

浙江圖書館善本

甲 登記號： 33262

一九 年 月 日




浙江圖書館

colorchecker CLASSIC



xrite



colorchecker CLASSIC



x-rite

